



**Ika-Napulo'g Lima nga Dominggo  
sa Kasarangang Panahon  
Hulyo 13, 2014**

## **RITO SA PAGSUGOD**

P: Sa ngalan sa Amahan ug sa Anak ug sa Espiritu Santo.

K: *Amen.*

P: Ang Ginoo maanaa kaninyo.

K: *Maanaa usab kanimo.*

## **Ma-Dominggong Tamdanang Liturhikal alang sa Simbahan sa Kabus sa Diwa sa Bag-ong Ebanghelisasyon**

**A**ng Simbahan sa Kabus, pinaagi sa Gagmayng Simbahanong Katilingban, makapadayag sa paglaum sa himaya alang sa tanang katawhan ug tanang binuhat nga karon nag-agulo sa kasakit kon saksihan niya pinaagi sa pulong ug sa buhat ang pagtoo diha sa Makaluluwas nga Pulong nga iyang gitabangan pagsabwag.

Nadawat nato ang Pulong, mituo kita sa Pulong, nahimo kitang tigdala sa Pulong, nahimo kitang mga mag-aambit sa Pulong. Apan gigamit nato ang daghan kaayong mga pulong aron ipadayag ang Pulong, ug tingali, natabonan nato ang Pulong pinaagi sa atong mga pulong. Atong higugmaon, ilhon, ipasigarbo ug sundon ang Pulong, si Jesukristo, sa mas halawom ug mas suod nga paagi. Ipadayon ta ang atong pagpatalinghog sa giingon sa PKP-II mahitungod kang Jesus:

### **“9. Isip Pari, Propeta, Hari**

**(59)** Usa siya ka propeta. Gipamulong niya ang pulong sa Ginoo. Sa pagkatinuod siya ang pulong sa Diyos nga nahimong unod.

Namulong siya nga may awtoridad. Iyang gipaluyohan ang iyang gisulti dili lamang ubani sa mga buhat nga may gahom kon dili uban usab sa di-malalis nga pagsaksi bahin sa iyang kaugalingong kinabuhi.

**(60)** Isip propeta iyang gimantala ang pag-abot sa Gingharian sa Diyos. Iyang gipunting ang presensya niini diha taliwala sa katawhan. Gitawag niya ang katawhan sa pagbag-o sa kinatibuk-ang kinabuhi ug gihatag niya kanila ang kapasayloan sa ilang mga sala. Iyang gipanghimaraot ang dautan ug gigun-ob niya ang mga timailhan niini pinaagi sa tumang kaisog ug gugma.

**(61)** Hari siya. Apan iyang gihugasan ang mga tiil sa iyang kaugalingong mga tinun-an. Mianhi siya, dili aron alagaran, kon dili aron moalagad, aron moula sa iyang kaugalingong kinabuhi isip tubos sa tanan. Gihatag na sa Amahan ang tanan ngadto sa iyang mga kamot, apan iyang gigamit kining iyang gahom dili aron manghari ug manggun-ob kon dili aron manghatag ug kinabuhi ug kalamboan. Wala mahaum ang iyang gingharian sa mga hiyas ug bili sa kalibutan. Dili siya iya sa kalibutan.”■

## **Pasiuna ug Pag-abi-abi**

Mga minahal kong mga igsoon:  
Karon, maminaw kita kang Jesus  
nga nagtudlo kanato kon unsaon  
nato pag-andam sa atong mga  
kasingkasing aron sa pagdawat sa  
mga liso sa pagtoo diha sa Pulong.  
Unsaon nato pagpaminaw kaniya  
diha sa mga agulo sa katawhan ug sa  
kinaiyahan ug sa ekolohiya. Unsaon  
nato sa pagsangyaw sa kaluwasan sa  
atong panahon ug ang kahingpitan  
niini sa umaabot. Unsaon nato sa  
pagpuyo sa solidaridad ug pakighiusa  
sa paglaum diha sa kahingpitan sa  
himaya sa Diyos ugma damlag,  
karon!

## **Akto sa Paghinulsol**

P: Mga igsoon, ato karong ang  
konon ang atong mga sala aron  
mahimo kitang takus nga magsaulog  
niining misteryo sa gugma ug  
kaaghop sa Diyos.

P: Ginoong Jesus, ikaw ang  
kagahapon, karon ug ugma. Ginoo,  
kaloy-i kami.

*K: Ginoo, kaloy-i kami.*

P: Kristo Jesus, ikaw ang Pulong  
nga nahimong unod. Kristo, kaloy-i  
kami.

*K: Kristo, kaloy-i kami.*

P: Ginoong Jesus, ikaw ang paglaum  
ug kahingpitan sa kinabuhii. Ginoo,  
kaloy-i kami.

*K: Ginoo, kaloy-i kami.*

P: Kaloy-an unta kita sa Dios...  
ngadto sa kinabuhing walay  
katapusan.

*K: Amen.*

## **Himaya sa Diyos didto sa langit...**

### **Kolekta**

P: Mag-ampo kita: O Diyos,  
kinsa nagpakita sa kahayag sa  
imong kamatuoran ngadto sa mga  
nahisalaag, aron sila mobalik  
sa dalan nga matarung, ihatag

sa tanan nga tungod sa pagtoo  
nga ilang gipadayag giuhap nga  
mga Kristiyano, ang grasya sa  
pagsalikway sa bisan unas nga  
nahisukwahi sa ngalan ni Kristo ug  
sa pagpanlimbasog alang niadtong  
tanang nga maghatag kaniya'g  
dungog . Pinaagi sa among Ginoong  
Jesuskristo, imong Anak, nga buhi ug  
hari uban Kanimo diha sa kahiusahan  
sa Espiritu Santo, Dios nga usa,  
hangtud sa kahangturan.

*K: Amen.*

## **LITURHIYA SA PULONG**

### **Unang Pagbasa: Is 55:10-11**

L: Ang Pagbasa gikan ni Propeta  
Isayas.

(Basahon gikan sa Kasulatan)

L: Ang Pulong sa Ginoo.

*K: Salamat sa Dios.*

### **Komentaryo sa Is 55:10-11:**

Sa dihang ang pagbalik sa mga  
bihag gikan sa Babilonia ngadto sa  
Jerusalen nag-umbaw na, kining  
mga linyaha gihalad alang sa pulong  
sa Diyos: buhi, tabunok ug may  
katakus sa pagpamabdos, gamhanan  
sa pagmugna ug pag-amoma sa bag-  
ong kinabuhi. Ang pulong sa Diyos  
matinud-anon sa iyang mga saad,  
sa iyang kasabutan. Ang iya lang  
gipangayo gikan sa iyang katawhan  
mao ang pagbalik ngadto kaniya ug  
sila mahiuli ngadto sa ilang yuta.  
Hinoon, mobalik man ang iyang  
katawhan ngadto kaniya o dili, anaa  
siya kanunay alang kanila, aron sa  
pagtuman sa iyang pulong, sa iyang  
gugmang nahimong unod, ang iyang  
Pulong!

### **Salmo Responsoryo: Sal 65:10, 11, 12-13, 14**

(Basahon gikan sa Kasulatan)

### **Komentaryo sa Sal 65:**

Halad sa Diyos kining awita ug adunay kini'y tulo ka bahin: (a) ang talan-awon sa templo, (bb. 2-5); (b) ang talan-awon sa uniberso o kapunaw-punawan (bb. 6-9); ug ang (k) yuta sa Israel (bb. 10-14). Kining teksto sa salmo karon naapil sa ikatulong bahin. Gihulagway dinhi ang pag-amoma sa Diyos sa yuta sa Israel, ug giunsa sa yuta, ang materialidad sa yuta – uban sa iyang mga kasubaan ug kadagatan ug ang mga nanagpuyo sa kinaiyahan niini – sa pagtubag nga mauyonon: puno sa kabahandianon sa Diyos, ming-ulbo sila sa kalipay ug kahinangop. Ang bersong gibalikbalik makahuluganon kayo: anaa na kaniya ang kagahapon ug ang kaugmaon. Ang ugma ania na sa karon!

### **Ikaduhang Pagbasa: Rom 8:18-23**

L: Ang Pagbasa Gikan sa Sulat ni San Pablo ngadto sa mga Taga-Roma.

*(Basahon gikan sa Kasulatan)*

L: Ang Pulong sa Ginoo.

K: *Salamat sa Dios.*

### **Komentaryo sa Rom 8:18-23:**

Makatandog ug nindot kaayo kining pamahayag ni Pablo mahitungod sa iyang gipaabot nga himaya alang sa tanang binuhat. Wala niya bulaga ang kapalaran sa katawhan sa kapalaran sa kinaiyahan: sa paglalang sa unang lalaki ug babaye, namugna usab ang kinaiyahan uban kanila. Sa ilang pagkahulog sa sala, nahulog usab ang kinaiyahan. Sa pagpaabot sa bag-ong kinabuhi, ang katawhan ug ang kinaiyahan nagpaabot sa ilang himaya, nga anaa na diha ni Kristo apan wala pa sa iyang kahingpitan. Apan ang mga Kristohanon adunay hamiling papel diha niining paglaum sa himaya: tuod uban sa ubang katawhan ug kinaiyahan, ang mga Kristohanon nag-agulo usab, apan, tungod niining ilang paghupot sa unang mga bunga sa Espiritu, busa ang mga

Kristohanon kinahanglang magsangyaw sa hiyas niining paglauma – isangyaw ang Nindot nga Balita sa atong kaluwasan, isip usa ka pagsagop, diha sa solidaridad uban sa tanang katawhan ug mga binuhat nga nanag-agulo sa kasakit.

### **Berso sa Aleluya:**

T: **Aleluya, aleluya.** Ang liso mao ang pulong sa Diyos, si Kristo ang magsasabwag; ug ang tanan nga moduol kaniya makahupot ug kinabuhing walay katapusan! T: **Aleluya, aleluya.**

### **Ebanghelyo: Mat 13:1-23**

P: Ang Ginoo maanaa kaninyo.

K: *Maanaa usab kanimo.*

P: Ang Santos nga Ebanghelyo sumala ni San Mateo.

K: *Himayaon ikaw, O Ginoo.*

*(Basahon gikan sa Kasulatan)*

P: Ang Ebanghelyo sa Ginoo.

K: *Daygon Ikaw, O Kristo.*

### **Komentaryo sa Mat 13:1-23:**

Si Jesus, ang magsasabwag sa pulong sa gingharian sa langit, nagtahud sa kagawasan sa mga nakadungog sa nindot nga balita isip puling pamaagi sa pagkinabuhi. Aduna kadtong dili makasabot niini o modumili sa pagsabot niini, mao nga ilang tugotan ang kaatbang sa puling pamaagi sa pagkinabuhi nga mosakmit niini. Adunay usab uban nga modawat niini sa tumang kalipay apan sa hamabaw nga paagi nga nagkahulogan nga buot silang modawat niini basta walay sakit ug sakripisyong kuyog. Mao man bitaw nga sa ilang pagkakita sa ubang tumutoo nga nagpuyo ug lisud nga kinabuhi o kaha gipanggukod tungod sa nindot nga balita, sayon ra gyud dayon nilang i-surender ang ilang pagtoo ug ilang pangitaon ang kalipay sa ubang dapit gawas sa gingharian sa Diyos. Apan aduna pay lain usab nga

namati sa pulong sa Diyos, apan dili nila kini masabtan tungod kay halawom ang ilang pagpagamot sa kaharuhay, bahandi ug gahum. Tuod dili sila subsob makasimba, apan ilang gipaliyokan ang ilang kaugalingon sa mga balaan nga mga tawo ug ilang giputos ang ilang kaugalingon sa daghang mga debosyon, apan bisan pa niana, sa ilang kahiladman dili makapamunga ang gingharian sa Diyos. Apan kadtong mga andam sa pagdawat sa nindot nga balita nga kinasingkasing gayud, ilabi na ang mga kabus ug mga mayukmok, sila ang may katakus nga makapahimong tinuod sa gingharian aron kini molambo ug mohatag ug abundang ani. Sakiton sila ug tingali sila mamatay, tungod sa ilang pakighiusa sa solidaridad uban sa mga lumulopyo sa gingharian ug sa ilang kawsa. Apan ang ilang pakigbisog mamunga, ug sa dakong katingalahan, bunga alang sa tanan, apil na gani kadtong naggukod ug nagpatay kanila!

Please help us continue publishing this Missalette with your donation.

Any amount is appreciated no matter how small.

Thank you!

Account Name:

Communication Foundation for Asia

Metrobank V-Mapa, Sta. Mesa,

Manila Branch:

SA# 3306-509-480

BDO Old Sta. Mesa Road, Manila Branch:

SA# 7090-042-836

Please fax deposit slip to 713-2736

We are located at # 4427 Old Sta. Mesa St., Sta. Mesa, Manila

**Wali: Ang Simbahan sa Kabus, pinaagi sa Gagmayng Simbahanong Katilingban, makapadayag sa paglaum sa himaya alang sa tanang katawhan ug tanang binuhat nga karon nag-agulo sa kasakit kon saksihan niya pinaagi sa pulong ug sa buhat ang pagtoo diha sa Makaluluwas nga Pulong nga iyang gitabangan pagsabwag.**

Sumadang Mensahe sa mga Pagbasa sa Dominggo	Ang Simbahan sa Kabus: Konkretoong Hulagway sa kabus ug sa ilang kahintang	Mga Puntos para sa Pamalandong/Panawagan/Hagit
Ang Simbahan sa Kabus, pinaagi sa Gagmayng Simbahanong Katilingban, makapadayag sa paglaum sa himaya alang sa tanang katawhan ug tanang binuhat nga karon nag-agulo sa kasakit kon saksihan niya pinaagi sa pulong ug sa buhat ang pagtoo diha sa Makaluluwas nga Pulong nga iyang gitabangan pagsabwag.	Unsa mang mga aguloa sa mga binuhat ang imong nadunggan diha sa inyo? Giunsa man pagdawat o pagtratar niining mga aguloa sa mga tawo diha sa inyong lugar, o sa inyong GSK? Unsay imong o inyong nahimo aron matubag kining mga agulo sa katawhan ug sa kinaiyahan diya sa inyo?	Naluwas na ni Kristo kita ug ang tanang binuhat, apan nagpadayon gihapon ang pag-agulo sa tanan samtang nagapaabot sa kahingpitan sa atong pagkasinagop ug sa pagbag-o sa mga binuhat aron mosalamin kini sa kahingpitan sa himaya sa Diyos. Sa kasamtangan, atong isangyaw kining solidaridad sa paglaum sa himaya ni Kristo.

**Padayag sa Pagtoo**

P: Nagatoo ako...

K: ...Sa Dios ang Amahan ang makagagahum sa tanan, Magbubuhat sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu

Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

### **Mga Katilingbanong Pag-ampo**

**P:** Mga hinigugma kong mga igsoon, ato na karong ipadangat ang atong mga agulo ug paglaum ngadto sa atong langitnong Amahan nga nagpatalinghug kanato sa mata'g yugto sa atong kinabuhi.. Sa mata'g pag-ampo, kita motubag: Ginoo, himoa kaming buhing saksi sa solidaridad sa paglaum.

**T: *Ginoo, himoa kaming buhing saksi sa solidaridad sa paglaum.***

**L:** Mag-ampo kita alang sa Simbahan: nga isip Simbahan sa Kabus sa tibook kalibutan, iya untang ipadayon ang pagpaminaw pag-ayog yud sa mga panginahanglanon sa katawhan ug sa tanang binuhat ug dinha ipadayag ang solidaridad sa paglaum diha ni Kristo, atong Manluluwas. Mag-ampo kita sa Ginoo.

**T: *Ginoo, himoa kaming buhing saksi sa solidaridad sa paglaum.***

**L:** Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip Katawhan sa Dios: nga, sa ilang pagsangyaw sa Nindot nga Balita, makat-on usab sila sa pag-ugmad

sa mga kaumahan sa kalibotan ug sa pag-andam sa pagsabwag sa mga liso sa pagtoo, pinaagi sa paglubog diha tawhanong kahimtang ug sa mga kalisdanan sa tanang mga binuhat. Mag-ampo kita sa Ginoo.

**T: *Ginoo, himoa kaming buhing saksi sa solidaridad sa paglaum.***

**L:** Alang sa mga lideres sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga ila untang tukoron ang mga puling sistemang pang-edukasyon ug pagpanday sa pagkatawo nga nagsalamin sa mga hiyas ug bili sa personal nga kaligdong, katilingbanong hustisya ug katilingbanong pagpakabana alang sa kinatibuk-ang kabag-ohan. Mag-ampo kita sa Ginoo.

**T: *Ginoo, himoa kaming buhing saksi sa solidaridad sa paglaum.***

**L:** Alang kanatong tanan, mga lumulupyong sa kalibutan ug sakop sa kalangitan: nga magdinasigay unta kita sa pagpalambo sa di-ako-akohong paghigugma sa silingan, sa dili hakog nga pag-alagad sa tanang katawhan bisan asa ug sa pinakadakong paghalad sa pag-amoma sa atong palibot ug sa tibook kalibutan ginamit ang mga kahimanan sa bag-ong medya ug katilingbanong komunikasyon. Mag-ampo kita sa Ginoo.

**T: *Ginoo, himoa kaming buhing saksi sa solidaridad sa paglaum.***

**L:** Alang sa atong mga minahal sa kinabuhi nga milalin na: nga diha sa kapasayloan sa ilang mga sala, maila na unta ang pahulay nga dayon diha sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

**T: *Ginoo, himoa kaming buhing saksi sa solidaridad sa paglaum.***

**L:** Alang sa atong mga espesyal nga mga tinguha, sa kahilom sa atong tagsa-tagsa ka kasing-kasing,

(*mohilum kadiyot*) .... Mag-ampo kita sa Ginoo.

**T: Ginoo, himoa kaming buhing saksi sa solidaridad sa paglaum.**

P: Ginoong Diyos, mao kini ang mga pag-ampo nga among gipadangat kanimo karon. Nagahangyo kami kanimo nga ihatag nimo kini kanamo pinaagi sa paglig-on kanamo isip mga sinagop mong mga anak ug tigsibya sa paglaum diha sa kahingpitan sa imong himaya. Kini among gipangayo pinaagi ni Kristo atong Ginoo.

*T: Amen.*

## LITURHIYA SA EUKARISTIYA

### Paghalad sa mga Gasa

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

*K: Daygon ang Dios hangtod sa kahangturan.*

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.

*K: Daygon ang Dios hangtod sa kahangturan.*

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

*K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.*

### Pag-ampo Alang sa Mga Halad

P: Tan-awa nga mapuangoron kining mga halad sa Simbahan, O Ginoo,

samtang siya naga-ampo kanimo, ug ihatag nga, sa pagkaon niini niadtong mga nagtoo, mapadangat sila sa mas halawom nga kabalaan. Pinaagi ni Kristo among Ginoo.

*K: Amen.*

### Prepasyo

P: Ang Ginoo maanaa kaninyo.

*K: Maanaa usab kanimo.*

P: Ibayaw ang inyong mga kasingkasing.

*K: Amo nang gibayaw ngadto sa Ginoo.*

P: Magpasalamat kita sa Ginoong atong Dios.

*K: Angay ug matarong.*

P: Angay ug matarung gayud, sibo ug makaluwas, kanunay ug sa tanang dapit nga magpasalamat kami kanimo, Ginoo, santos nga Amahan, labawng makagagahom ug walay-kinutubang Diyos.

Kay imong gihigugma sa tuman ang kalibutan ug sa imong kalooy gipadala mo kanamo ang Manluluwas, nga magpuyo sama kanamo sa tanang paagi gawas lamang sa sala, aron imong higugmaon dinhi kanamo ang imong gihigugma diha sa imong Anak, pinaagi sa kansang pagkamasinugtanon nahipauli kami ngadto niadtong mga gasa nga gikan kanimo, nga, sa among pagpakasala among nawagtang diha sa among pagkamasupakon.

Ug busa, Ginoo, uban sa tanang mga Anghel ug mga Santos, kami usab nagapasalamat kanimo, ug sa paghimaya, nagasinggit sa walay hunong nga pag-ingon:

### Santos

*K: Santos, Santos, Santos nga Ginoo, Dios sa kagahaman. Puno ang langit ug yuta sa imong himaya.*

*Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.*

### **Pag-ampo sa Eukaristiya**

*(Human sa konsagrasyon, ang aklamasyon:)*

P: Kini ang misteryo sa pagtoo.

**K: Luwasa kami, O Manluwas sa kalibutan, kay pinaagi sa imong Krus ug Pagkabhaw gipalingkawas mo kami.**

*(Sa pagtapos sa Pag-ampong Eukaristiko, ang pari moingon:)*

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

*K: Amen.*

### **Rito sa Pangalawat**

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

*K: Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kalan-on namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonoa luwasa kami sa dautan.*

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

*K: Kay imo man ang ginharian/ ug ang gahom ug ang himaya/ hangtod*

*sa kahangturan.*

P: Ginoong JesuKristo, nag-ingon ka sa imong mga Apostoles, “Ang kalinaw ibilin ko kaninyo, ang akong kalinaw ihatag ko kaninyo.” Ayaw tanawa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

*K: Amen.*

P: Ang kalinaw sa Ginoo sa kanunay maanaa kaninyo.

*K: Maanaa usab kanimo.*

P: Ipakita ta ang atong panaginigsoonay.

### **Kordero sa Dios**

*K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.*

### **Pangalawat**

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

*K: Ginoo, dili ako angay nga mokalawat kanimo, apan ipamulong lamang ug mamaayo ako.*

### **Pag-ampo Human sa Pangalawat**

P: Mag-ampo kita: Human makakaon niining mga gasa, naga-ampo kami, O Ginoo, nga, pinaagi sa among pag-apil niining misteryo, ang iyang makaluwas nga sangputanan diri

kanamo motubo unta. Pinaagi ni Kristo among Ginoo.

*K: Amen.*

**Katapusang Panalangin:**

P: Ang Ginoo maanaa kaninyo.

*K: Maanaa usab kanimo.*

P: Moduko kita ug atong dawaton ang bendisyon sa Ginoo: Pabalika ang imong katawhan diha kanimo sa tibook nilang kasingkasing, O Ginoo, naga-ampo kami, kay imo man ganing panalipdan bisan kadtong mga nahisalaag, apan kon sila mo-alagad na kanimo sa bug-os nga kasingkasing, imo silang gisapnay uban sa mas mabination nga pag-amoma.

*K: Amen.*

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

*K: Amen.*

**Pagpanglakaw**

P: Panglakaw kamo sa kalinaw, ug pagahimayaa ang Ginoo pinaagi sa inyong kinabuhi.

*K: Salamat sa Dios. ■*

U**ban** si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo.

Bisitaha ang [gospelbreak.wordpress.com](http://gospelbreak.wordpress.com). o pinagi sa inyong smartphone o tablet i-swipe kini nga QR code.



**Ang  
Simbahan sa  
Kabus, pinaagi  
sa Gagmayng  
Simbahanong  
Katilingban,  
makapadayag  
sa paglaum sa  
himaya alang  
sa tanang  
katawhan ug  
tanang  
binuhat nga  
karon  
nag-agulo sa  
kasakit kon  
saksihan niya  
pinaagi sa  
pulong ug sa  
buhat ang  
pagtoo diha sa  
Makaluluwas  
nga Pulong nga  
iyang  
gitabangan  
pagsabwag.**